

12. oktober 2022

UKA 2022/70

**Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaannut avammullu assartuinissamut sullissinissamik akuersissutaata atuukkunnaarsinneqassappat pitsaaqtissai ajoqqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UKA 2023 nallertinnagu tunniunneqassaaq. (Inatsisartunut ilaasortaqa Jens-Frederik Nielsen, Demokraatit)**

Siumumiik Jens-Frederik Nielsen, Demokraatit siunnersuutaannut qujarusuppugut, imatullu oqaasertalissuarput.

Siumumiik tunngaviusumik Namminersorlutik oqartussat suliffeqarfiutaasa aaqqussuteqqinneqarnissaat tamakkiisumik aammalu ilaatigut ataasiakkaartumik nalilersortuarnissaat pingaartipparput.

Siumut isumaqarpoq nutarterineq qangalu peruserineqarsimasut apeqqusersorneqarsinnaasariaqartut piffissaq tulluarnerpaaq atorlugu. Nalunngilarpummi annertuumik allannguinerit RAL- ip ingerlassimangaai, umiarsuit qanganisat aserfallassimaqisut taarserneqarput, SIKUKI talittarfiup pilersinneqarnerani Island- imi Eimskip suleqatigineqalerpoq, sapaatip akunneranut ataasiaq ukioq naallugu umiarsuaqartalerpugut aammalu nunat aqqusaakkat soorlu Island, savalimmiullu ilaalerlutik umiarsuit tulluarsakkat atorlugit. Siumumiik isumaqarpugut suliffeqarfimmik allannguneq annertooq aammalu inuaqatigiinnut malunnaataasussaq suliarineqarsimasoq, aatsaallu aallartilaartoq.

Siumumiik misissuinissaq, nalilersuinissaq isumaqatingaarput, kisiannili massakkut piffissaasorinngilarput. RAL- immi suleriuseq nutaaq, nunamik allamik suleqateqarneq takuteqqaartariaqarpaa qanoq inuaqatigiinnut sunniuteqassanersoq. Minnerunngitsumik massakkut nunarsuarmi sorsunnerit allallu aaqiagiinnginnerit pilersuinikkut kingunerluutigisinnaasaat ernumanartoqartillugit, Siumumiik isumaqarpugut isumatusaarnerrulluta alloriarnerit ingerlattariaqarigut.



Siumumiik misissuinissaq isumaqatingaarput, kisiannili aamma amingaateqarsorivarput. Isumaqarpugummi kisermaassisuunissamik liniefart atorlugu misissorneqartariaqartoq, soorlumi projekt- inut assartuinermi ammaatereernikuugingut unammillerfiusinnaasutut. Taakkuali saniatigut assartuinermi akit nalilersorluarneqaqqinnissaat Siumumiik kissaatingaarput, massakkummi kujammut nassiussineq, soorlu aalisakkanik, raajanillu akit naapertuutinnigittut, tassa imatut paasillugu akivissaa atornagu ukiorpassuarni akikillisaavigineqarsimmata, tamannalu uagut inuiaqatigiit akilersorparput nunatsinnut nassiussinerup akisunerutinneqarneratigut. Suliffeqarfissuit aningaasarsiornikkut ajornakusoortitsinerungallarmata aaqqissuussineq taanna atuuppoq, massakkullu tamanna nalilersoqqittariaqalerparput, iluanaarutimmi aammalu nunarsuami akit qaffakkiartorneri ilagalugit kaaviaartitat akillu qaffakkiartorsinnaammata. Imannak aperisoqarsinnaavoq, uagut nunatsinni atuisut, aalisarnermut suliffeqarfissuit akikinnerusumik nunatsinniik annissinerat akilersussavarput?

Siumumiik oqaaseqaatigut tuniliaqutaralugit allannguutissatut siunnersuuteqarumavugut:

**”Royal Arctic Linep Kalaallit Nunaani avammullu immakkut assartuinermit kisermaassilluni sullissinissamik akuersissutaa atorunnaarsinneqassappat, taamalu unammilleqatigiinneq eqqunneqassappat, niuertunut atuisunullu pitsaaqutissai ajoqutissaalu pillugit, Naalakkersuisut misissueqqullugit peqquneqarnissaanik siunnersuut. Misissuineq Inatsisartunut UKA 2025 nallertinnagu tunniunneqassaaq.”**

Siumumiik allannguutissatut siunnersuut akuerineqarsinnaappat ataatsimiisitaliamut susasaqartumut ingerlateqqipparput.

Siunnersuuteqartup aammalu Naalakkersuisut siunnersuutaat tamaasa itingartippagut. Allannguutaasinnaasulli allat pitsaanerusut ammaffigivagut.

Kuno Fencker, Siumut.